

## Script Of Evening Gojri News Bulletin 10 June 2024 at 1700 Hrs

ایوننگ گو جری نیوز بلیٹن مورخہ 10 جون 2024

\*\*\*\*\*

یوہ آکا شوانی جموں ہے عبدالمجید تے محمد امین انجم تیں خبر سٹو۔ پہلاں خاص خاص خبر۔

\*\*\*\*\*

- \* 1۔ لیفٹنٹ گو رنر منوج سنہا نے ہسپتالوں غو دورو لا یو تے ریا سی دہشت گرد حملہ مانہہ زخمی ہوا عقیدت منداں غی صحت با رے جانکاری حاصل کی۔ شہید افراد غا نزدیکی وارث نانہہ 10 لکھ روپیاں اور زخمی افراد نانہہ 50/50 ہزار روپیا ایسگریشہ رین غو اعلان کیو۔
- \* 2۔ ضلع ریا سی مانہہ دہشت گرد حملہ غا ذمہ داراں نانہہ پکڑن واسطے بڑی تلاشی کا روائی چل رہی ہے۔
- \* 3۔ وزیر اعظم نریندر مو دی نے پی ایم کسان سمان نییدی غی 17 ویں قسط جاری کی ہے۔
- \* 4۔ وزیر اعظم نریندر مو دی نے کہیو ہے جے بھارت اُن غی سرکار غی تیجی با ریا مانہہ خطہ غی امن ترقی تے خوشحالی واسطے کم جاری رکھے گو۔

-----

خبراں غی تفصیل نال پہلاں عبدالمجید۔

### LG Terror Attack

لیفٹنٹ گو رنر منوج سنہا نے ریا سی مانہہ ہوا دہشت گرد حملہ نانہہ جموں خطہ مانہہ بے چینی پیدا کرن آلی اک ناجائز کوشش قرار دتو ہے۔ گو رنمنٹ میڈیکل کالج جموں مانہہ زخمی افراد سنگ ملن تیں بعد اخباری نمائنداں نال گل کرتاں واں لیفٹنٹ گو رنر نے اس طرح کہیو۔۔۔بائٹ۔۔۔

\*\*\*\*\*

### NIA Reasi

قومی تحقیقاتی ایجنسی این آئی اے غی ٹیم اج ضلع ریا سی پُجی تے تارین عقیدت منداں غی بس ور ہوا دہشت گرد حملہ غی چھان بین واسطے مقامی پولیس نال تعاون کر رہی ہے۔ اس حملہ مانہہ 9 افراد ہلاک تے کئیں زخمی ہو گیا تھا۔ آکا شوانی جموں غا نمائندہ نے رپورٹ ٹوری ہے جے حفاظتی دستاں نے ذمہ دار دہشت گرداں نانہہ پکڑن غی خاطر بڑی گھیرا بندی تے تلاشی کا روائی چلائی ہے قابل ذکر ہے جے دہشت گرداں نے 53 سیٹاں آلی بس جھپڑی شیو کھوڑی تیں ماتا ویشنو دیوی مذہبی تھار کٹڑا جا رہی تھی ور گولی با ریا شروع کر دی۔ جس غی وجہ نال بس ضلع ریا سی گا پونی علاقہ مانہہ آن آلا تریاٹھ گراں مانہہ سڑک تیں کھسک غے ڈونگی کھائی مانہہ جا پئی۔ اس بس مانہہ اُتر پردیش، راجستھان تے دہلی غا عقیدت مند سفر کر رہیا تھا۔ دسیو گیو ہے جے راجستھان تیں بشمول اک 2 سال غا بچہ تے راجستھان تیں 1 چودہ سال گا بچہ سمیت 9 افراد غی موت ہو گئی۔ چشم دیداں غے مطابق اُت 2 دہشت گرد تھا۔ علاقہ مانہہ کاروائی جاری ہے۔ تے گھنا جنگل مانہہ تلاشی کرن واسطے 5 ٹیم بنائی گئی ہیں۔ جنگلی علاقہ مانہہ تلاشی واسطے ڈرون غو استعمال کیو جا رہیو ہے۔

\*\*\*\*\*

### Reasi Search Operation

ا تواریں شام نانہہ شیو کھوڑی تیں واپس آتی بس ور دہشت گرداں گا حملہ تیں بعد اج سویرے ریا سی مانہہ سلامتی دستاں نے اک تلاشی کا روائی چلائی ہے۔ یاد رہے جے اس دہشت گرد حملہ غا نتیجہ مانہہ 9 یا تریاں غی موت ہو گئی تھی تے 33 دوجا زخمی ہو گیا تھا۔ ایس ڈی

آر ایف وی ریا سی پُجی ہے تے واردات غا کول کال تے گھنا جنگلات غا علاقہ مانہہ تلا شی کا روائی غے دوران ٹرون غو استعمال وی کیو جا رہیو ہے۔ یاہ بس شیو کھوڑی تیں کٹڑہ جا رہی تھی تے ضلع ریا سی گا پونی علاقہ مانہہ شام 6 بج غے 10 منٹ غے قریب اس بس ور دہشت گردان نے حملو کر دتو۔ اس دوران بس ڈرائیور تیں بے قابو ہو غے ڈونگی کھائی مانہہ جاپئی۔

\*\*\*\*\*

## Congress Protest

جموں کشمیر غا ان علاقان مانہہ خاص کر جت حالات ماضی مانہہ پُر امن رہیا ہیں تے ہُن ان علاقان مانہہ بدھتا دہشت گرد حملان غے خلاف اج کا نگرہس نے زبردست مظاہرو کیو۔ جموں کشمیر پردیش کانگریس کمیٹی غا کار گزار صدر رمن بہلا غی رہنمائی مانہہ پا رٹی غا دوجا سنئیر لیڈران نے پی سی سی صدر دفتر شہیدی چوک جموں غے باہر احتجاج کرتان واں ضلع ریا سی مانہہ شیو کھوڑی تیں کٹڑا آتی بس ور دہشت گردان غا حملہ غی سخت مزمت کی۔ یا د رہے اس حملہ مانہہ 9 افراد غی موت ہو گئی تے 33 افراد زخمی ہوا ہیں۔ جن غو تعلق زیادہ تر دہلی تے یو پی سنگ تھو۔

\*\*\*\*\*

## Protest Kathua

سابق فوجیان غی بہبود بارے ایسو سی ایشن کٹھوعہ غی طرفوں ایسو سی ایشن غا چیئرمین کیپٹن گیان سنگھ پٹھانیہ غی سربراہی مانہہ پاکستان تے پاکستان غی شہ ور کم کرن آلا دہشت گردان غے خلاف زور دار احتجاج کیو گیو۔ جنہاں نے ریا سی مانہہ ویشنو دیوی غی یا ترہ واسطے آیا معصوم یا تریاں نانہہ نشانو بنایو۔ اس واقع مانہہ ہلاک ہوا یا تریاں نانہہ خراج عقیدت پیش کرن غا سلسلہ مانہہ 2 منٹ غی خاموشی اختیار کی گئی۔ مظاہرین نے دہشت گردان غے خلاف سخت کاروائی تے پاکستان نانہہ سبق سیکھان غو مطالبو کیو۔ مہارا ضلع نامہ نگار پر دیپ شرما سنگ گل کرتان واں کیپٹن رگھو بیر سنگھ نے اس طرح کہیو۔۔۔

\*\*\*\*\*

یہ خبر تم آکا شوانی جموں تیں سن رہیا ہیں خیراں غا باقی حصہ نال حمد امین انجم

## Modi PM Kissan

جناب نریندر مو دی اج تیجی بار وزیر اعظم غا طور کم کاج سمبھالیو۔ چارج لین تیں بعد انہاں نے پہلی فائل کسان سمان ندھی بارے دستخط کی۔ انہاں نے مذکورہ سکیم غی 17 ویں قسط جاری کی۔ اس کاروائی غا نتیجہ مانہہ 9 کروڑ 30 لکھ کسانان نانہہ فائدو ملے گو۔ اس ضمن مانہہ تقریباً 20 ہزار کروڑ روپیہ تقسیم کیا جائیگا۔ وزیر اعظم نے کہیو ہے جے ان غی حکومت غو پہلو فیصلو سرکار غی کسانان بارے بہتری غو عزم ظاہر کرے۔ وزیر اعظم مو دی نے کہیو ہے جے مستقبل مانہہ ان غی سرکار کسانان اور ذرعی سیکٹر واسطے ہو رکم جاری رکھے گی۔ قابل ذکر ہے جے پی ایم کسان اسکیم 2019 مانہہ شروع کی گئی تھی جس غو مقصد تمام ملک بھر غا زمیندار کسانان نانہہ آمدنی مہیا کرانی ہے۔ مذکورہ اسکیم غے تحت ہر سال 2 ہزار روپیاں غو مالی فائدو اہل کسانان نانہہ پچایو جائے۔ یاہ سکیم مرکزی سیکٹر سکیم غے تحت سو فیصد مالی مدد غے طور مرکزی حکومت غی طرفوں عملائی جارہی ہے۔ اس ضمن مانہہ رقم براہ راست مستفید افراد غا بینک کھاتاں مانہہ منتقل کی جائے۔ یاہ رقم 2/2 ہزار غی 3 قسطان مانہہ دتی جائے۔ واضع رہے جے پی ایم کسان

سکیم غے تحت 11 کروڑ کسان گنباں نانہ فائدو ملیو ہے۔ تے بن تک 3 لکھ کروڑ تیں متا روپیہ کھاتاں مانہ منتقل کیا جا چکا ہیں۔

\*\*\*\*\*

## PM Meet

وزیر اعظم نریندر مو دی نے کہیو ہے جے بھارت اُن غی سرکار غی تیجی باری مانہ خطہ غا امن، ترقی تے خوشحالی واسطے کم جا ری رکھے گو۔ اک تحریر مانہ اُنہاں نے لوکاں تیں لوکاں سنگ ڈونگا تعلقات واسطے کہیو ہے۔ جناب مو دی بھارت غا گو انڈی مُلکاں غا لیڈراں سنگ میٹنگ کر رہیا تھا۔ اس موقع ور حاضری دین واسطے گوئڈی مُلکاں غا لیڈراں غو شکریو ادا کرتاں واں وزیر اعظم نے بھارت غی پہلاں گوئڈی آلی پالیسی بارے بھارت غو عزم دوہرایو۔ قابل ذکر ہے جے جناب مو دی نانہ کل شام ویلے لگاتار تیجی بار وزیر اعظم غے طور حلف دوایو گیو۔ کو نسل غا ممبراں غے ہمراہ صدر جمہو ریہ درویدی مُرمو نے جناب مو دی نانہ عہدہ تے راز داری غو حلف دوایو۔ اس سلسلہ مانہ راشٹر پتی بھون مانہ اک تقریب غو انعقاد ہوؤ۔ حلف برداری غی تقریب مانہ 30 کابینہ وزیراں، 5 وزیر مملکت انڈینڈینٹ چارج اور 36 وزرائے مملکت نانہ حلف دوایو گیو۔

\*\*\*\*\*

## Cabinet Meeting

نویں کا بینہ غی پہلی میٹنگ اج منعقد ہونی متوقع ہے۔ یاہ میٹنگ شام ویلے منعقد ہو سکے۔ کل وزیر اعظم نریندر مو دی نے نواں کو نسل ممبراں نے حلف لیو تھو۔ صدر جمہو ریہ درویدی مُرمو نے راشٹر پتی بھون مانہ منعقد اک تقریب مانہ جناب مو دی نانہ نواں کونسل ممبراں غے ہمراہ حلف دوایو۔

\*\*\*\*\*

## NITI Ayog Unemployment

نیتی آیوگ غا سابق وائس چیئرمین راجیو کمار نے اج کہیو ہے جے وزیر اعظم نریندر مو دی غی سربراہی مانہ تیجی واری بنی سرکار نانہ مُلک مانہ بے روزگار غا مسئلہ غو حل کرنو چاہیے۔ تے سرکار نانہ 4مزدوری غا کوٹس نانہ حتمی شکل دینی چاہیے جس مانہ امید تیں زیادہ تاخیر کی جا رہی ہے۔ ہمنان پہچانو چاہیے جے کوئیڈ تیں پہلی معاشی بحالی کیسی تھی۔ اُنہاں نے مزید کہیو جے مو دی سرکار نانہ خصوصی طور ور غیر منظم تے لوہکا تے درمیانہ درجہ غا کاروباری اداراں مانہ بے روزگاری غا مسئلہ نال نمڑنو چاہیے۔ روزگار غا موقع پیدا کرن غا سلسلہ مانہ دو اہم چیزاں وچوں اک چیز لوہکا تے درمیانہ درجہ غا کاروباری اداراں واسطے کم غی صورتحال آسان بنانو ہے۔

.....

## Public Darbar

داخلہ امور بارے محکمہ غا پرنسپل سیکریٹری چندرا کر بھارتی نے اج ضلع اُدھم پور غا دورہ غے دوران اک پبلک دربار غی صدارت کی۔ اس عوامی دربار مانہ ضلع مانہ ترقی بابدہ غی سرگرمیاں تے عوامی مسائل غو جائزو لیو گیو۔ ضلع ترقیاتی کونسل اُدھم پور غا چیئرمین لال چند، ضلع ترقیاتی کمشنر اُدھم پور سلونی رائے، ایس ایس پی اُدھم پور جوگیندر سنگھ تے مقامی لوکاں نے اس عوامی دربار مانہ شرکت کی۔ اس تیں پہلاں سیکریٹری موصوف نے ضلع غا بکھ بکھ محکماں غی طرفوں قائم کیا گیا اسٹالز غو معائنو کیو۔ اس تقریب غے دوران عوام نے اپنا مطالبات تے مسائل تولاں حل واسطے مباحثہ مانہ سامنے رکھیا۔

\*\*\*\*\*

اس غے نال ہی خبراں غو یوہ بلیٹن ختم ہوؤ۔